

MÉSI VECHI

DI

VITTORIO GOTTARDI



46612

TREVISO

Premiata Tipo-Litografia e Fonderia Caratteri

ANTONIO LONGO

1883

.....
Proprietà letteraria
.....

1

A LE VOSTRE FORFE
DONINE BELE
RACOMANDO STO PICOLO LIBRO

.....

- p. 41 - O'Connell -

GENARO







Sta note, àla sentio de vento che folade?
Xe vegnuda la neve, l'inverno è dei più crudi...
Po', a basso, gàla visto co' bianche xe le strade?
Gàla visto bambini calcarle coi piè nudi?...


Ela sta qua, Marchesa, in stanze riparade,
Avanti el caminetto, coverta de veludi:
E la varda, tra i veri, la neve a calde ociade,
E la dixe con gusto: « i bei zorni è vegnudi. »

Ma su ne le sofite, ma zo nei sotoscala,
In sti zorni i pitochi più sofre e più se amala,
E i poeti più rusteghi diventa e i dixe - sala ! -

Putèi, no metè trapole, ne l'orto, ai oseleti!
Putèi, no butè neve in testa dei vecieti!
Siori, pensè che al freddo ghe xe tanti poareti.



FEBBARO







Xc el mese breve, breve :
Come sto me soneto :
E el tempo se lo beve,
A vu!... come un voveto.

Tra refoli de neve,
Tra un fredo benedeto,
El passa lieve, lieve
L'è un atimo!... un sufieto!...

Fussili curti tanto,
Cussi passasse presto,
I di nostri de pianto!

Gavesse ognun la sorte
Essendo stufo e mesto
Cussi trovar la morte!



MARZO





Quanti scherzi fa el tempo e che matae!
Che incostanti zornade e capriciose:
A l'alba da un sol belo iluminae
E più tardi, vardè, scure e piovose! -

Su da le siese ancora despogiac,
Su da le strade bianche e polverose,
Eco i soli de marzo e le ventae
Fredissime cussi, cussi noiose! -

Creature, aveu la tosse? Restè a letto:
Sta ariazza matussela xe la morte,
Sto mese xe el più strambo e malandreto!

A casa! a casa! e ben tapadi drento -
Donine mic, se avè le gambe storte,
Donine mic, no cimenteve al vento! -



APRIL







El sol spande d'intorno l'alegria
E nel mondo se inalza, da ogni sito,
Una fresca canzon, 'na poesia
Che se rampega su, ne l'infinito.

Torna i vecieti ancora su la via :
Ne l'aria i gà sentido un novo invito,
I trova che la forza no è finia,
E i vede tutto zovene e pulito.

Alzè i oci ai balconi. Tra dei fiori,
Sbociadi al primo sol de sta matina,
Fa baossete una testa de putela :

Una testa che fila i primi amori,
Che aspeta incocalida una divina
Zogia de basi su la boca bela ! -



MAGIO





Se verze le finestre a l'aria bona,
E se varda d'intorno. Da un'altana
Sfuma el profilo d'una bela dona,
E se trema d'amor come una cana ...

Vien a noia el lavoro - e la fiaccona
Vien, la cefebre fiaca veneziana,
E se dixe che l'arte ne sbufona
E se buta i quaderni alla lontana,

Mentre i mussi, poarini, da le stale
Fa *concorenza* ai critici vilani,
Ai critici che stampa tante bale,

Le bale che se vende per vangelo,
Nei più grandi zornali italiani,
Scriti da qualche apostolo ciochelo!



ZUGNO





(Lettera rusticana)

Carro Signor patron. Vegno con questa
pichela letarrina ad informarla
che è venguta d'al cielo la tempesta
chel prete no è sta bono de scassiarla ..

Io gli scrivo, ma go tanto de testa ...
el gran, i fruti, e l'ua ... che no se parla,
f' in geri, t' anto bela ancù l'è pesta
mi me manca el cor aglio de guardarla ...

Capissela, patron, quello che scrivo ? ..
gho sudà, l'avorato al tempo belo ...
gho preghà la Madona col c' ativo,

al piovàn gho dà vovi per la s' agra ...
e la verto che nato m' è un putelo,
che son morto mio pare de pelagra.



LUGIO





(Ricordi militari)

Se brusa. No ghe xe bava de vento,
L'aria infogada, bassa sclerata,
Pesa su la campagna... E un regimento
Fa soto sto fogòr la passeggiata! -

Le file va in disordine e un lamento
Un desiderio d'acqua e de fermata
Va timido a le boche e un sfinimento
Ciapa i occhi e le gambe... « O che no i bata

Che no i bata el segnal de *zaino a tera?* »
- Fuori il passo, fiacconi! Dritti, fieri! -
E la trupa va avanti, sporca, nera

De sudor e de fango. Avanti, avanti!...
Casca un soldà. El fa apposta?... Presto i ferì!
Nol se move?... L'è morto?... Eh! ghe n'è tanti!



AGOSTO






(In Venezia)

Bele note d'Agosto! Una barcheta
Sbrissa via, senza ciasso, ne i canali
Più sconti, verdi, streti... La mareta
Fa dei zoghi de luse coi ferali,

L'acqua carezze, e basi ga l'arieta:
E da la teraferma ad intervali
Vien d'amor una dolce canzoneta
Vien 'na gran pase da le quiete cali...

Soto un balcon la barca s'è fermada.
Senza rumor... Un'anema no passa...
La bona luna ha indormenzà la strada...

Xe l'ora dei morosi. Varda!... Ascolta!
Una dona, che ana, la se sbassa,
E la dixe de no, l'ultima volta! -



SETEMBRE






De soto a le tirele, una vilana
Solèva i brazzi nudi ai graspi fati :
Fra i caveli ghe passa l'aria sana,
E ne la testa calcoli beati...

Eto, da drio le spale, a la lontana,
Se la magna coi occhi. No gh'è pati :
Più el la varda e più el sente la scalmana,
I caldi desideri dei tosati.

— El raccolto de l'ua xe sta copioso ...
Digo, voleu che femo sta monada ?..
Me toressi vu, Bia, per vostro sposo ?... »

Tase la puta e in viso l'arossisse ...
Ma la vida de fogie despogiada
I più ardenti struconi la tradisse.



O T O B R E






(In villeggiatura)

Drento un carozon a doradure,
Vegneva, da Venezia, i nostri noni,
Seguidi da una coa de cargadure,
Dai più eleganti e alegri peruconi.


Tra i albari, le dame, più sicure
Se dava ad amoreti, a bali e soni:
Nasceva le più celebre aventure,
Fioriva la comedia de Goldoni.

Drento un vagon, ancuò, de terza classe,
Vien i nevodi a far economia,
A tirar zo 'na barca de lamenti,

Lagnandose, col prete, de le tasse...
Del setecento, credo no ghe sia
Che i soliti scroconi e maldicenti! -



NOVEMBRE






Casca le fogie. E cala soto tera
I veciereli e i zoveni malsani:
El ciel s'ha fato scuro e su la sera
Tira un'aria che ga cento malani...

De rondini vedè l'ultima schiera
Che svola e scampa ai lidi più lontani:
Ve pesa adosso una tristezza nera,
Un ignoto dolor ve ciapa ai pani.

I albari col vento ora i se lagna:
E el vento dixe storie che fa pena,
Mentre i siori poeti, dopo cena,

Canta el zalo squalor de la campagna,
Canta la fata che a la morte mena...
Tociando nel Barolo el pan de Spagna!



DECEMBRE





Xe tornada la neve. Xe passai
I zorni, i mesi, come una saeta ...
Cussi presto?... Ma come?... Come mai?..
E sentimo nel cuor quasi una streta.

Se gerimo a genaro radunai
In quatro, cinque amici a una ceneta :
Semo soli, a decembre, e sconfortai...
Xe i nostri amici in tera benedeta.

Pur, atorno el foghèr, la famegiola -
Sperando megio i di che vegnarà -
Le lagreme se suga e se consola...


El destin de la vita xe sto qua : —
Spetar sempre cussi, sempre inganai,
Una felicità che no vien mai.



*Fatto di stampare
il dì 8 Novembre MDCCCLXXXIII
nella premiata tipografia Antonio Longo
in Treviso*



46612



Box 11
- 497